



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 7

**Rahul Gandhi-i Indian Parliament aser democracy mezüngmeshiogo: BJP**

**Imran Khan mechi Lahore nung lokti adenshiba nokdang**

VOL. XX NO. 146 (ADOK 146)

DIMAPUR YANGTEPNÜ (THURSDAY)

METSÜREMI (MARCH) 09, 2023

₹ 5.00

## Janata Dal (United) Nagaland unit lokaogo

**Dimapur, March 8, 2023 (TYO):** 14 buba Nagaland Legislative Assembly indang election nung Janata Dal United-i menden ka nung takok ngua liasü saka Bodbarnü JDU Nagaland unit lokaogo.

"JDU Nagaland unit president-i central party dang masüngdangtepi Chief Minister Neihpiu Rio-i aniba sorkar pusemba shidi agütsü" ta

JDU general secretary, Afaque Ahmad Khan-i ashi.

Tashi mangaba aser tashiyim mapa inyakba atema JDU Nagaland state committee loksar, ta paisa ashi.

Taküm Nagaland assembly election nung JDU-i menden 7 nung toktepa liasü aser Jwenga Seb-i Tseminyu constituency nungi takok angu.

## DNSU-i tatidang agütsürtem moatsür

**Dimapur, March 8, 2023 (TYO):** Dimapur Naga Students' Union (DNSU)-i HSLC aser HSSLC Examinations 2023 agütsüsü aliba kaketshir ajak moatsüogo.

DNSU-i moatsüba den külemi kaketshirtem dang pei tajungtiba agi aser timi tatidang agütsüsü ayongzüker, ta Secretary, Education and Statistics Tesiding Newmai-i sangdong ka nung

ashi. DNSU-isa Power department dang tatidang mapang power supply shitak agütsüsü mepishia metetdaksüogo.

HSLC aser HSSLC Examinations 2023 ya March ita tesadang ka tashi dang agütsü lir anungji iba mapang kaketshirtemi power supply majungba timtem majurudaksüsü mepishir, ta DNSU-i ashi.

## Manik Saha-i maneni Tripura CM inyaker

**Agartala, March 8, 2023 (Agencies):** Bodbarnü Dr Manik Saha-i Tripura nung kümsük tanaben chief inyaksü atema tezüngzüktep agiogo.

Iba sentong nung Prime Minister Narendra Modi, Union home minister Amit Shah aser BJP national president JP Nadda nung aden.

Tripura nung BJP MLA temi pa shimba sülen Manik Saha-i Hombarnü Governor dang sorkar akümtsü asüngdanga liasü.

Taküm Tripura Assembly election nung BJP-i menden 32 nung takok angu. Parnok sülen Tipra Motha-i menden 13 nung takok angu.

**Tripasa nung atema interlocutor shimtsü:**

Union Home Minister Amit Shah-i Tripura nung lisopurtem indang 'constitutional solution' atema interlocutor ka shimtsü lemtetogo ta TIPRA Motha Chairman Pradyot Kishore Manikya Debbarma-i ashi.

Tripura nung BJP sorkar tezüngzüktep agiba sülen Home Minister Amit Shah, BJP national president JP Nadda, Assam Chief Minister & NEDA Convener Himanta Biswa Sarma aser Tripura Chief Minister Manik Saha nung den senden ka amenba sülen Pradyot-i iba osang metetdaksü.

## Election sülen Khar yimtak rongrong adok



**Mokokchung, Metsüremi/ March 08(TYO) :** Nagaland nung election temer kelen Khar yimtak rongrong adoka tensa mesüngjemi lir.

Osang ajanga angashiba agi March 4 aonung tzülu jen ka rongtoktsü, iba sülen ano March 6 aonung Farm House ana rongtoktsü maneni ano March 7 aonung Lok Janshakti Party(Ram Vilas) candidate Dr.Longri tenu

Supongmayang dak aonung 9 ako meta kidangi aoba mapang nung nisung anati arua azük.

March 7 aonungsa Maruti 800 gari ka kanga mejungi raksatsüba den ano kasa aonungsa Lok Janshakti Party(Ram Vilas) candidate Dr.Longri phukumer Nikenchujang-er kidang ayaterm 12: ako nung bomb pokdaksüba osang lir.

## Nagaland nung International Women's Day among



March 8, 2023 nü The Heritage, Kohima nung International Women's Day amongdang agiba noksa ka angur.

**Kohima, March 8, 2023 (TYO):** Nagaland nung Bodbarnü "DigitALL: Innovation & Technology for gender equality" omen nung ajemdaker International Women's Day mongogo.

The Heritage, Kohima nung sentong ka agiba nung Padma Shree Awardee aser taoba UPSC züngsem Dr P. Kilemsungla-i tetushi süa jaoker ka ama shilem agia liasü.

Iba sentong ya Department of Social Welfare, Department of Women Resource Development, Nagaland State Commission for Women, Nagaland State Social Welfare Board aser State Hub for Empowerment of Women külemi yaritepa ayongzüker.

"Tanü loktiliba nung temelenshi bener arutsü atema Information Technology ya hadir tajungtiba kümogo aser tetsürtemi nüngdakba tebilemstütem atema mapa inyaksüla" ta Dr Kilemsungla-i o jembidang ashi.

"Digital maparen ajanga sexual & reproductive health care,

digital literacy aser applications angazüker aser iba ajanga teyari tulu angutsü. Technology ajanga nisung ajak atema tenokdangba agienogo, kechiyong tesüiba mapang shisaliok ya takokeri dang angazük saka tanüba ajaki angazükter" ta laisa ashi.

"Ki toktsür moutetertemia online ajanga senotsü aazüker aser tangar atema mapa adoktsür. Asenoki iba maongka tasen ya agizüksüla. Technology ajanga nisung ajak külemi tajangzük ngudaksür aser loktiliba aika nung tetsürtem nem tajangzük agütsür" ta Dr Kilemsungla-isa metetdaksü.

Asenok kanga dang kara ainba alima nung alir aser asenok tamendakdak shitak melira temelenshi sülen manidaktetsü, ta laisa ayongzüker.

"Tetsürtemi asenok ya tetsür ka mesüra aiür ka dang ta ila mebilemstüla saka asenok ya kibong, loktiliba aser linük yangertem ta bilemstüla" ta Dr Kilemsungla-isa tetsürtem ayongzüker.

Iba sentong nung Social

Welfare Secretary aser NSSWB Administrator, Martha R. Ritsea wadang balala nung tetsürtemi takok anguba indang lemsatetep.

"Tetsürtem tashi aittsü atema tetsürtem kümsüka ayutsüla aser onok indang One Stop Centre, Women Helpline-181 amala services ajanga ken o tem benoker. OSCs aser WHL-181 ajanga ken o 1000 tema angadangogo" ta Ritse-i ashi.

Department of Social Welfare-i Mission Shakti ajanga tetsürtem tashi aittsü atema mapa inyaka arur. Department-isa district tasentem nung Empowerment Of Women District Hubs, One Stop Centre, Beti Bachao Beti Padhao amala lapoktsü atema Ministry den jembia arudar, ta laisa ashi.

Tanü sentong nung kaketshirtem aser tesayurtem atema 'Digital citizenship & gender equity', 'Women in technology: Scope for information technology' aser 'Safety and security in digital spaces' onüktem nung technical workshops agia liasü.

## Mathung Yanthan-i protem speaker inyaksü

**Dimapur, March 8, 2023 (TYO):** 14 buba Nagaland Legislative Assembly nung protem speaker inyaksü atema Nagaland Governor La. Ganesan-i Mathung Yanthan shim.

NLA nung protem speaker

Mathung Yanthan-i MLA tasen ajak tezüngzüktep agidaksüsü.

"Constitution of India nung Article 180 nung Clause 9(1) ajanga kü nem tashi agütsüba ama Mathung Yanthan-i Speaker mapa inyaksü shimer. 13 buba

Nagaland Legislative Assembly Speaker Sharingain Longkumer-i mapa nungi anenba nungi Assembly-i Speaker tasen ka meshim tashi Yanthan-i Speaker mapa inyaksü" ta Governor Ganesan-i metetdaksü.

## India sorkar aser Naga olemtepertem angatetteptsüla: Y Patton

**Kohima, March 8, 2022 (TYO):** Naga olemtepertem aser India sorkar tsüngda Naga yimjung olemtepertem angatetteptsüla ta Nagaland Deputy Chief Minister, Y Patton-i ashi.

"Centre sorkar aser Naga yimten olemtepertem tsüngda angatetteptsüla aser iba nung NDPP-BJP sorkari maneni yariteptsü" ta Patton-i ashi.

Prime Minister Narendra Modi, Union Home Minister Amit Shah aser BJP national president J.P. Nadda nungeri anir India sorkari Naga yimten latettsü kanga bilemer, ta paisa ashi.

"Neiphu Rio lenisüba kübok state sorkari kanga dang süoki ia bilema yaritepa aruogo" ta Patton-

isa shisem.

Naga nung tenzüksü atema kümsük tanaben Deputy CM mapa agütsüba atema CM Rio dang kanga pelar aser nübertemi imlaba ama NDPP-BJP teloktepi sorkar ketdangsüa aotsü amanger, ta paisa metetdaksü.

NDPP-BJP teloktepi tanga political party temi pusemba agizüker ano opposition maliba sorkar ka akümtsü asü ta osangbeneri asüngdangdang "political party aikati sorkar nung shilem agitsü mulunga aliba shiogo saka NDPP-BJP jungjunga jembiteptsü kechiyong onoki menden 37 nung takok ngutetogo" ta Y Patton-i langzü.

Chief Minister-i dang portfolio lemsatsü aser anogo ka-ana tsüngda

itemji inyaksü, ta paisa ashi.

Mongulbarnü NDPP-BJP-2 sorkar mezüngbuba cabinet senden atema asüngdangdang "tejak shiyutepta senden ka dang liasü aser Supreme Court-i tuyuba ama taküm May tatemlen tashi nung Urban Local Bodies election agitsü cabinet-i jembia" ta Patton-i langzü.

Deputy CM Y Patton ya BJP Legislature Party leader shimogo aser pai Prime Minister Modi, Union Minister Amit Shah, BJP national president JP Nadda, Assam Chief Minister Himanta Biswa Sarma, union minister aser BJP national leader tem aser karyakartas-i election nung takok angutsü yaritepta atema pelaba metetdaksü.

# Mkg nunga tetsürtem anogo metsünga reta mungogo



Watsü Mungdang-i International Women's Day nungtem yangi Mokokchung nung sentong ka ayongzüka amungdang tangokba noksa nung angur. Mokokchung, 8th March, 2023

**Mokokchung, 8th March (TYO):** "DigitAll: Innovation & Technology for Gender Equity" omen dak rangloker alima ajunga den külemi Watsü Mungdang-ia Aor Kilem, Sangtemla Ward, Mokokchung nung 'International Women's Day' nungtem sentong tajung ka ayongzüka mungogo.

Iba sentong nung Women on Wealth nung ketdangsür, Sheetal Gurung-i "Embrace Equity" onük nung ajemdaker jembia liasü. Lokti tejakleni aotsü asoshi tetsür nem lenmang balala nung maongka

lapoktsütsüla, ta lai ashi.

Takok ya nisung ka kijai dangbo makoker, nüburtemi nungitba ajanga dang takokji ajangzüktet, anungji, "kati ka nungitpepa ajungkettsütsü merangtsüla", ta lai ayongzüka. Lokti nung ochi aziütsü atemaji sakuku maongkaji kanga nungdaker, ta laisa shisem.

Iba sentong nung tetsür entrepreneur par asem – Anthophile flores kibur Dr. Ketinaro Aier, Berem kibur Chubalemla, Sen Bakes kibur Sentirenla parnoki business balala inyakdang ajangshibatem

lemsatop. Watsü Mungdang tir, S. Arenla Longkumer-i tarurtem pela-a agizük aser Dr. Sashila Aier ajanga melepzüing o jembia liasü.

International Women's Day amungba nungtem nung liso tetsürtemi yanglutetba brand balala indang chiyungtsü aser osettsüset tapu balala sayuba den ayokba sentonga ka agia liasü.

Iba sentong nung Aotsür den ano Mokokchung nung alir tanga kin tsür telungjem balala nungi ketdangsürtem arua shilem agia aden.

## T.Senka Ao-i züluba "Apu Külenji" ta asüba yimdangjem kakat sayaogo



Padmashree T.Senka Ao-i(tiyong) züluba "Apu Külenji" ta asüba yimdangjem kakat tanu Aongza Ki Mokokchung nung Aoli Watsü Mungdang Tir Wt.Arenla(tachichi nungi tanabuba) sayatsür kelen ASLB lenirtem aser sentong nung shilem agir kar den tangokba noksa angur.

**Mokokchung, Metsüremi/ March 08(TYO) :** Padmashree T.Senka Ao-i züluba "Apu Külenji" ta asüba yimdangjem kakat tanu Aongza Ki Mokokchung nung Aoli Watsü Mungdang Tir Wt.Arenla sayatsüogo.

Iba kakat sayatsür kelen Watsü Mungdang Tir Wt.Arenla Lkr-i mapang tatsüka agia jembidang asen Ao kin tebang o dang asü aser ibaji dang mulungzüing yua aru aser aibelendang temerenshi senchi achi, saka tanu zülü putu zülüa yutsübaji ajanga asen oshi tejakleni aotsü teimla akarta ashi.

T.Senka Ao-i asen Ao oshi zülüa nüburtem nem angazükdaktsütsü inyakba mapang nung kaseta indoktsü tashi amokmerenogo, saka item ajakji arema asen nübur asoshi takum bendanga aguja inyaka angudang tenungsang agutsür aser ano manen nübur ajangzükdaktsütsüsa zülutsü takum arishi moajangta sarasademtsüdata Wt.Arenla Lkr-i adenshia aliba nüburtem ajungshi.

Kakat Zülur T.Senka Ao-i jembidang 1964 küm nungi Naga lima nung class-10 tatidang nung Tenyidi aser Ao oshi agi tenzüka, iba sülenji parnokbo University nung research tashi agidagi saka saka asen Aor-bo len tom ka nungang lir, anungji asenok teinyaktsü tuluka lirta ashi.

Kibong nung tsürabur aser chirnur tsüingda Ao oshi dang jembia lia kidang alitsü bendanger tsümar ka arura pa denji jembia jembia kibong nung alir tsüingdaji Nagamese dang jembir, anungji asen atep nung oshi nung kimaker aitogo, aji asünung asenok kanga dang mita alitsülata kakat zülur T.Senka Ao-isa tesasaba olen ka shisem.

Kakat zülur T.Senka Ao-isa Ao oshi temaba nung ajungkettsü mangdang nung alima dang asen Ao oshi sangdongdaktsütsü asoshi iba sentong nung yim aser kiyong balala nungi Ao oshi meimertem, Ao tesayurtem aser Kakatreju nung Ao oshi azüingertem jaoka lir, anungji asenoki asen tetsü Ao oshi koleni aorta taroki yiagi

shisadangdita telok ayongzüka jembia.

Kasa sentong nung sentong tenzüka Asso.Pastor MTBA Rev.Temsüwati-i sarasadem aser Wt.Bendangsenla Fazl Ali College nung Asst.Professor-i kakat omasa ratet ashi iba den ano Ao Senden Literature Board Tongti Z ülur Wb.I.Temjen Tzüdir-i tajungshi o jembia aser tatem nung Tsüngrem nem tenungsang aguja Alempang Baptist Arogo Asso.Pastor(W) Wt.Sentitula-i sarasadem aser Fazl Ali College nung Asst.Professor Wt.Toshisangla ketdangsüba nung iba sentong agia liasü.

Padmashree T.Senka Ao-i iba tang Apu Külenji ta asüba kakat züluba ya zünga kakat 16 buba zülur aser iba kakat nung otsü

tapu balala, saya(drama),kibalembubaren aser Ao oshi jungle mongsen indanga zülüa lir. Iba kakat ya yimdangjem kakat ka deng masü saka shisa jenti ngutetba kakat ka asütsü. Iba kakat jenjang ya senpak 350 aser kakat ayokba dokantem nung angutsü.



Langpang Ward, Tuli nung March 7 nü M/S Aong Filling Station ta sür Indian oil company indang totzü ayokdak tesem ka lapoker külen sentong nung shilem agia adenertem külemi tangokba noksa nung angur. Iba Aong filling station Tuli Lenden Baptist Arogo, Associate Pastor, I. Odang-i meshiteta sarasademtsü. Mokokchung, March 7, 2023

## Army tem International Women's Day amung



**Dimapur, Metsüremi/March 08 (TYO):** Spear Corps kübok Red Shield Division indang Chakabama Battalion ajanga Kezo Town aser anasa aliba yimtsüngtem nungi tetsürtem den International Women's Day munga liasü.

Iba benjongmung nung

Battalion indang Medical Officer temi mapa meranga inyakba tetsürtem den sensaksem aka aser tashidak balala nungi jenbua alitsü aser taneptsü angutsü lenmangtem indang jembia liasü.

Iba sentong nung tetsür 110 dak tema arua shilem agia liasü.

## Peren nung International Women's Day amung



Peren district kübok Kendung Village nung March 8, 2023 nü International Women's Day amungdang tangokba noksa ka yangi angur.

**Dimapur, Metsüremi/March 08 (TYO):** Alima ajunga den külemi district administration aser Sakhi One Stop Centre (OSC) Peren lungjemer March 8, 2023 nü Peren district kübok Kendung Village nung International Women's Day munga liasü.

Iba sentong nung shisalen sayur ama Grace, Counsellor OSC ajanga 'Digital innovation and technology for Gender equality' omen nung jembia liasü.

Tetsürtem aser tajemzüka jenjang nung alirtem technology dangi anir aruba ajanga lenmang balala nung takokba jenti alitsü aser sentong tasen asatetsü aser gender equality temaba jenjangi ajungkettsü, ta lai ashi. Tetsür dang sorkar kübok

scheme balala indang lenmang sayutsüla, ta laisa ashi.

OSC indang case worker Peheilusile ajanga Sakhi One Stop Centre scheme indang rateta ashi, koba ajanga police teyari, medical teyari, psycho-social counselling, legal counselling amala teyaria agütsür.

Iba kübok ano timtem ajurua aliba tetsür khen atema jenokdak tesema agütsür, ta laisa ashi.

Tetsür nem tashi temeden agütsütsü aser lenla ajak nung sako amshitsü dak sendakba nunga iba sentong nung sensaksema liasü.

Iba sentong nung Tiakaba ajanga sarasadema liasü aser sentong nung adener ajak nem süngö jemdakja liasü.



March 08, 2023 nü Kolkata nung Trinamool Congress MP, Mala Roy, West Bengal Ministers-Shashi Panja aser Chandrima Bhattacharya nungeri party nung lenirtem den International Women's Day aser Holi repsema amongdang tangokba noksa nung angur.

## Sorkari tetsürtem nem tashi agütsütsü atema inyaker: PM Modi

**New Delhi, Metsüremi/ March 08 (Agencies):** Bodhbarnü International Women's Day anogomong nung Ato kilonser, Narendra Modi-i India terenlok nung tetsürtemi shilem tajung agiba atema tetsürtem nem tenüngsang agütsü.

Modi-isa, tetsürtem nem maneni tashi agütsütsü atema sorkari inyaksü, ta metetdaksü.

Pai twitter ajanga, "International Women's Day anogomong nung tetsür dak aliba tashi atema tetushi agütsü. India terenlok nung tetsürtemi shilem

tajung agiba atema onoki tenüngsang agütsü. Ozü sorkari tetsürtem nem maneni tashi agütsütsü atema inyaksü," ta pai lemsatep.

Modi-isa tangar dak alakteta inyakba tetsürtem 'Mann Ki Baat' nung tetshia aliba lemsatep.

Union Defence Minister, Rajnath Singh-ia tetsürtemi lenla balala nung shilem tajung agiba atema tetsürtem nem tenüngsang agütsü. Rajnath-i twitter ajanga, "Ato kilonser Narendra Modi lenisüba nung sorkari schemes aser program balala ajanga tetsürtem nem

ano tashi tali agütsütsü atema inyaker," ta lemsatep.

"Alima nung tongbang raraba tesem talangtiba, Siachen nungi tenzüka raraba rongtem nunga sepa tetsürtem lir. India tsürtemi Armed Forces ajak nung otsü tasen yangludar," ta paisa lemsatep.

External Affairs Minister S Jaishankar-ia, "International Women's Day anogomong nung asen linük nung tetsürtemi inyaktetba mapatem atema tenüngsang agütsü. Parnoki inyakba shilemji Atmanirbhar Bharat ainba otsü nung züngoktsü," ta lemsatep.

## Tihar nung Manish Sisodia nisung tamajungertem den puoka lir: AAP

**New Delhi, Metsüremi/ March 08 (Agencies):** Bodhbarnü Arvind Kejriwal-i aniba Aam Aadmi Party (AAP) nungi lenirtemi, party lenir aser taoba mapang Delhi Deputy Chief Minister, Manish Sisodia, Tihar Jail nung nisung tamajungertem den külemi puoka lir, anungji parnoki pa tepsettsüa akok, ta metetdaksü.

AAP otongdar, Saurabh Bharadwaj-i, Tihar Jail nung Sisodia nisung tamajungertem den külemi puoka lir; pa 'Vipassana' takdang nung puoktsü memela, ta metetdaksü.

Osangbenertem den jembidang pai, "Manish Sisodia jail nung Vipassana takdang nung puoktsü mepishia liasü aser court-ia iba temepishibaji agizükogo. Ajsüaka Sisodia jail number 1 nung nisung kanga tamajungertem den külemi dang puoka lir. Centre sorkari

telangzüba agütsütsüla," ta ashi.

Pai ashiba agi, tang ken o tejembidak mapang nung alirtembo Jail number 1 nung mayur.

"Linük nung nisung kanga tamajungertem puokba jail ji ibai lir," ta pai ashi.

Tang Sisodia ya Jail number 1 indang ward number 9 nung puoka lir.

AAP lenir, Sanjay Singh-ia, Sisodia ya nisung kanga tamajungertem puoka alidak puoka lir, anungji parnoki pa tepsettsüa akok, ta onoki tsüba bilemer, ta ashi.

Osangbenertem den jembidang pai, "Tanü temeshi Holi benjung mapang nung Manish Sisodia nisung kanga tamajungertem den külemi puoka lir, anungji pa tepsettsüa akok ta onoki tsüba bilemer; tanübo BJP aser AAP na tsükchitepba jenjang ya tashi tongogo," ta ashi.

"Mezüng ozü health

minister (Satyendar Jain) puok aser tang ozü education minister-a jail nung puokogo. CBI-i maneni mita bushir saka kuli kecha mangur. Charge sheet nung Sisodia tenüng mali, ajsüaka asalentong yanglur tongtiji pa lir ta shia lir," ta Singh-i ashi.

"Ni jail ketdangsertem dang BJP asalentong nung metsüktsü tekümdangtsü metetdaksür. Iba jail nung nisung aika tepsetogo, anungji pa-a tepsettsüa akok ta onoki tsübur," ta pai ashi.

Mongolbarnep jail ketdangsertemi, Tihar jail nung Sisodia teintet sensotem puokba tesem nung puoka lir aser tangar nem agütsüba ama kasa chiyungtsü agütsü, ta metetdaksa liasü.

Delhi excise policy ochimashi ken o dak sendakba nung taoba Amongnü CBI-i Sisodia pua liasü, iba sülen pai Deputy Chief Minister menden nungi anen.

## MENUNGRA BILEMTETER

Lt. Nungshijungla Ao (Longsa)



Asüba anogo: 09/03/2013

Oja, na sür küm ter (10) ajongba anogo tanü na onok den meliaka nü temeim mapa tajung bilemtetera sarasadema amonger aser onok melung nung na teti lir.

- Temeim kinungbo aser chirnur.

## Rahul Gandhi-i Indian Parliament aser democracy mezüngmeshiogo: BJP

**New Delhi, March 08 (Agencies):** UK nung Rahul Gandhi-i India nunger democracy, Parliament, yimtenren inyakyim aser nüburtem mezüngmeshiogo, ta BJP-i aitsü.

Rahul Gandhi-i RSS aija jembiba dak sendakba nung BJP lenir aser Information & Broadcasting minister Anurag Thakur-i, "RSS ya volunteer organisation ka lir aser parnoki linük telungjem aser akhümket atema lenla ajak nung inyaker. Ni Rahul Gandhi dang RSS camps nung adentsü ayongzüker; pai yangji aika angazüktsü," ta ashi.

Thakur-isa, "Ato kilonser Narendra Modi-a RSS nungi lir; pai kanga nendaka inyakba reprangdangang. 2001 küm nungi pai anogo ka danga animesüngzüki inyaker," ta ashi.

Congress lenir, Rahul Gandhi-i UK Parliament nung jembidang India nunger democracy, Parliament, yimtenren inyakyim, India nunger, judicial inyakyim aser security asalentongtem mezüngmeshiogo, ta BJP lenir tain,

Ravi Shankar Prasad-i metetdaksü.

Prasad-i, Rahul-i bendanger li nungi India aitsüba ya taaktsüka lir; India nunger inyakyim nung bendang linük shingaiya tiyongtsü maittsü atema India tangatetba lir; pai iba tanelaji yirutsütsü merangogo, ta aitsü.

"Rahul Gandhi tangatetba ajanga pa ya Maoist aser Marxist telok nung lir, ta onoki bilemer. Yamaji mesüra pai kechiba item ama oji jembitsü," ta Prasad-i ashi.

Prasad-i, "Onoki Congress Tir, Kharge dang ya asüngdang 'Na Congress nung shimba Tir ka süra Rahul Gandhi-i taaktsü meketi 'India nung democracy asentenshitsü atema America aser aser Europe nati tiyongtsü aita inyaksüla' ta jembiba oji pusemer asü? Rahul Gandhi-i jembiba oji nai pu-mesemra aitsütsüla," ta ashi.

Rahul Gandhi-i Cambridge University nung India aitsüba atema Union minister Kiren Rijju aser BJP MP, Vivek Thakur natia Rahul aitsügo.

## India-i Afghanistan linük nem wheat metric ton 20,000 agütsütsü

**New Delhi, March 08 (Agencies):** March 07, 2023 nü New Delhi nung Afghanistan atema India-central Asia Joint Working Group (JWG) mezüngbuba senden nung, Afghanistan litsü ya kiralongrartem jenokdaksütsü, training agütsü, kiralongra atema asalentong yanglutsü mesüra kiralongra balala atema kiralongrartem mesüra kiralongrar teloktem nem mamshidaksütsü atema bangjema liasü.

India-ia UNWFP den partnership nung Iran nung aliba Chabahar port ajanga Afghanistan linük nem wheat touzük metric ton 20,000 teyari agütsütsü sangdongogo.

Tamalen-a India-i Pakistan linük ajanga Afghanistan nem wheat metric ton 50,000 jungnüa agüja liasü.

Afghanistan nung India atema teblemtsü onük kaji- Pakistan nung amenoka aliba aser UN-i sangdongba LeT aser JeM kiralongrartem inyakyim lir.

New Delhi nung ayongzüka JWG senden nungji Kazakhstan, Kyrgyz Republic, Tajikistan, Turkmenistan, Uzbekistan aser

India linüktemi Afghanistan nung yimjung alitsü aser sorkar tashi aittsü atema linük nüchiso, telongjem den litsü akhümtsübuttsü aser Afghan linük inyakyim nung tanga linüktemi tiyongtsü ia meinyakdaksütsü nüngdak, ta bangjema liasü.

India sorkari sangdong ka ajanga, "Afghanistan nung UNODC nung lenirtemi India aser UNODC partnership nung Afghanistan nung temesepba mozü anema raraba metetdaksü aser India-i Afghanistan nung temesepba mozü achirtem nem teyari agütsüba atema India dang pelaba lemsatepogo," ta metetdaksü.

"Parnoki mepishiba nung ajemdaker India-i lenirtem/ UNODC partner agencies aser temesepba mozü shibelenertem nokdangba Central Asian Republics ketdangsertem nem capacity building training courses agütsügo," ta kasa sangdong ajanga metetdaksü.

Mezüngbuba JWG senden nungji shilem agirtemi Afghanistan yimtenren, security aser teyari balala nüngdakba tensa asadanga liasü," ta kasa sangdong nung shia lir.



Nadia, March 08, 2023: International Women's Day anogomong nung süaka Nadia nung tetsürtem lungro meludak mapa inyakba noksa nung angur.



## TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 09, 2022

### Opposition nung mennür mali

- P Tiamongba Aier

14 buba Nagaland Legislative Assembly indang election nung political party teimbai toktep aser nisung aikati takümbo tashitait Opposition ka alitsü imlaa liasü. Saka yaküm April ita Nagaland nung United Democratic Alliance (UDA) ta ser Opposition maliba sorkar ka akümbe ama ano taküm-a Opposition maliba sorkar ka akümstü inyaktepdar. Taküm election nung NDPP-BJP teloktepi menden 37 takok nguteta sorkar akümstü tezüngzüktep agiogo, ajisüaka parnok den election nung toktepa political party temia parnoki aniba sorkar den yariteptsü tenangzükba agia arudar. Lok Janshakti Party (Ram Vilas Paswan)-i mezüng NDPP-BJP teloktep sorkar pusemba indang shidi ka agüja liasü saka Bodbar tashi nung telok ajak amai sorkar pusemba osang metetdaksüogo. Naga Peoples' Front (NPF)-i anir Nationalist Congress Party (NCP), National People's Party (NPP), Republican Party of India (Ramdas Athawale), Janata Dal (United) aser Independent candidate temi NDPP-BJP teloktep sorkar nungitba metetdaksüogo aser iba tetezü Opposition maliba sorkar akümstü lenmang lapoker. Taküm election nung NDPP aser BJP sülen menden teimba nung takok angubaji Nationalist Congress Party (NCP) liasü. NCP-i menden 7 nung takok angu aser parnoki anir tanüngba political party tem aser talisa NPF-i Opposition shilem kanga dang agidaksünüa bilem saka Bodbarnü NCP Nagaland unit-i NDPP-BJP teloktep sorkar pusemstü asüngdangba National President Sharad Pawar-i mulunga agizükogo. Ano, Bodbarnüa JD(U) Nagaland state president Senchumo Lotha aser parnok MLA Jwenga Seb nati chief minister Neiphiu Rio den ajurutepa sorkar pusemba shidi ka agütsü aser iba sülen mapang tatsüka lir Nitish Kumar'er JD(U)-i Nagaland state committee loksaba osang metetdaksü. JD(U) Nagaland state president-i Central party dang masüngdangtepi Nagaland sorkar pusemstü shidi agütsübaji tashi mangaba aser tashiyim mapa ka lir anungji Nagaland state committee anentsür ta JD(U) national general secretary aser northeastern states in-charge Afaque Ahmad Khan-i Bodbarnü metetdaksüogo. Iba ajanga Nagaland nung election-i ayir ajak ya ruling nung dang dennürtem aser political party ticket abenba ya tenüng atema dang ta jangjajangja sayur. Asenok Naga nungger yamai dang odi süra sen, nübo, rongsen, mapang lalua election ya magishitsüla saka kümsük temer nomination dang sütepa MLA tem ya shimtsüla. Taoba Chief Justice of India N. V. Ramana-i 'parliamentary democracy tashi aitsü atema opposition tashi aittsüla' ta ashi aser iba ya India kübok state aika nung opposition tashimait akümbe nung ajemdaker jembiba lir. Legislative bodies nung jungjunga mejembitepi aser opposition melii yangluba ozüngtemji nübertem densa mapet akümer ta paisa tekümdangtsü ka ashi. Atangji N. V. Ramana-i ashiba olenji kanga shitak aser pa ama ozüng meteter nisung ka jagi tensa-mapang aser inyakyimji jungjunga asadanga shisadanger angsa iba olenji jembir asütsü. Alima nung democracy tulutiba ta züngshiba India linük nung tashitait opposition ka alitsüba kanga nüngdak. Iba ya Centre sorkar nung dang masü saka State aser Union Territory sorkar ajak nung kanga nüngdaker, kechiyong opposition-i shilem tajung agiba ajanga dang democracy ajanga takok angur. Ruling party-i sorkarji par meyong ama mekümdaksütsü aser tashi alia mamshidaksütsü atema Opposition tashitait ka alitsüla saka tia maka tanü Nagaland nungbo Opposition nung melinür dang kümogo aser iba ajanga sorkari taruba küm punguji Nagaland state koma anir aotsü aser koba tashi ka ketdangtsütsü ta kanga dang arentaka aser tsürema bilemer. Talisa Naga nungger loktitentetem aser public lennirtemia tashitait Opposition ka nüngdaker aser alitsü tim ta ola madokba angudang süngmanger. Tatem nungbo takoksarji tangar shinga masü saka asenok public dang asütsü.

## OLEMSABANG

### NAGA NUNGER POLITICIAN-TEM DANG TAYONGZÜKBA OLA

~ L. Kika Pongener.


14 buba Nagaland Legislative Assembly General Election tembanga aruogo, aser Political Party balala nungi nuburtemi meyongnem agüja MLA roker (60) Naga nungger nubur madak yimsusutsü shimtetogo. Anungji nuburtemi temulung lemteta shimtetba ama, ochishia yimsu asütsü temulungtetba alitsü 'Elected Member' ajak dang ajongshir. Tatar shirnok 'Ruling Party' nung dena sorkar anitsü tashi agütsür, parnok ajaki shisatsü tesadem agi 'Minister' menden nguaka, mesura monguaka aser Portfolio kechi lemezükdir ibajagi tenuk sunger, pei nem nungloktsüba mapa ochishia inyaksü ajongshir. Shirnok Ruling party nung maden, parnoki 'Opposition Member' tajung ka ama sorkar inyakyim nung tim mesui ochimashi inyakba tsüngsu pua anidaksüla, aser asen lima meima, nungsen arema, Assembly nung tasüita jembitsü temulungtetba alitsüla. Küm pongu (5) tsüngda nung sorkar anaben- asemben tashi raksa-a melenshitsüba shisatsü tatar shinga daka malitsüla. Aor shin o ka, 'Meja antsü tayudak maka aiben belenshiba ama'...ta jembir, iba amaji tanü Party ka nung, ano asüngpo tanga Party kati oli ta melenshijen melenshiba yimsusur/lennir ka masütsüla. Taoba sorkar nung inyakba ama, Naga nungger nujiso tatempang telemtetba ka agitsü 'Solution' ademer opposition maliba sorkar ka yangluba ama-to, tang sorkar nungbo mebenshitsü nubur ajaki ajongshir, kechiyong opposition maliba sokar kaji linuk aser nubur atema takoksa tulu-a ta nuburtemi jungjunga metetogo. Anungji nuburtem-ia angatetsüba kanga tongtipang kaji, asenoki meyongnem agüja shimtetba 'Tatar' shirnoki Ruling nung dener Minister menden nung mener pei nem lemezüktsüba mapa makoker, mesura terenlok mapa shidak meinyaker, parnok nemjibo taruba Election nungbo kechi komar'ka o tanang jembia aru-aka vote magütsütsüla. Ano 'Tatar' shirnok taoba sorkar nung atalokba ama, opposition nung küm pungo abensa-a mementeti Ruling sorkar nung adentsü arishidang nubur ashioktsür, parnok nemjibo taruba Election nungbo kechi komar'ka o tanang jembia aru-aka vote magütsütsüla.

Election agiba shia Naga nungger nujiso bushiba mapa ya tatempang telemtetba ka 'Solution' bener arutsü indang bangbettsü amai jembir aser nuburtem dang nangzükker. Ajisuaka, Election aiben aruli oli ta suiogo, saka tanü tashi kechi jenjang nung lir (?) Anungji iba nujiso bushiba mapa ya pongmang nung masü, saka asangsang nung mapa küma inyaksü kangasa meranga inyaksü nuburtemi ajongshir. Joko Naga nungger nuburtemi nujiso bushiba mapa nung tanü tashi telemtetba ka mekai atsülanga ojen aoba yagi, linuk tenzükertem daka tamang mekateti küma odagi, tema nung alir sorkar yimsusurtem daka temulung melemteti kümadokogo aser Center sorkar yimsusurtem daka tamang mekateti kümogo. Joko nuburtemi iba nujiso bushiba mapa ya kong koda-ka tempangtsü (?)...aji ongko madoktetü kümadokogo aser teimla ajak samaa-odagi. Tip külen nujiso nungdem nung temelen saru-sajibo onsaraba agi osettsüset nung jenjangbo tupet atur aser idangji nuburtem sensak tiai lujen alur. Atangji, joko nuburtemi timtem maremteti ola adoker, anungji linuk tenzükertem aser sorkar yimsusurtemi longjemer tekaraba nung nujiso bushiba mapa ya tatempang telemtetba ka dangi arutsü lenmang bushitsüla. Ano kanga tongtipang kaji, Assam lima majangi senzütsüba 'Foot Hill Road' ya teküratiba nung renemtsü kanga meranga inyaksü ajongshir, kechiyong iba mapa ya Naga nungger nuburtem ajunga taginuba mapa ka ta angateta teküratiba nung renemtsü merangtsüla.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Abraham aser par jabaso na indang film 'His Only Son' sayatsü



**March 08, 2023:** Taruba Easter nung "His Only Son" film sayatsü; iba film ya Abraham aser par jabaso, Isaac (Lipok 22) na otsü nung ajemdaker yangluba film lir.

Temelungertem tenla ajanga yangluba film mezüngbubaji iba film asütsü.

Osangbener den jembidang Angel Studios otongdar, Jared Geesey-i, "Tamang indang otsü yanglutsü atema onoki lemteta liasü," ta metetdaksü.

Iba film yanglutsü atema director aser taoba mapang U.S. Navy, David Helling-i apitet. Pa Iraq nung aliba lisem lima nung alidang Abraham otsü nung ajemdaker film yanglutsü apiteta liasü.

David Helling-i, iba film quality ji "The Chosen" aser "The Passion of Christ" den kasa asütsü, ta ashi.

Helling indang jembidang

Geesey-i, "Pa (Helling) Iraq nung aliba mapang nung pai Laishiba kanga azüng. Onoki iba film atema küm 5 tashi inyaka aruogo," ta metetdaksü.

"Nenoki 'The Chosen' film meimra nenoki 'His Only Son' film-a meimtsü," ta pai ashi.

Tsüngremi Pa ajaso chir tenla agütsüba ama Abraham-ia par jabaso Issac tenla agütsütsü melunga liasü, ibayongji iba film ya Easter mapang nung sayar.

Geesey-i, "Nisung aikati 'Kechiba Easter mapang nung Abraham indang film sayar?' ta bilema alitsüa akok. Ajisüaka pai ajangshibatem aser Tsüngremi pa dang par jabaso Isaac tenla agüjang ta ashiba den Yisui asenok atema taküm bendanga agütsüba ajanga asenoki Easter amongba na onoki medemdanga liasü. Tejen Lai ajanga asenoki Yisu taküm otsü reprangshibaji jangratemtsüka lir," ta ashi.

"Tanü Angel Studios-i ano alizüng tasen ka tongteta temelungertemi tenla agüja yangluba film mezüngbubaji ibai lir," ta Angel Studios CEO, Neal Harmon-i metetdaksü.

"Angel Studios-i agiba telemtetbatemji temeimertemi ajungshiba ajanga lir aser 'His Only Son' film atema ghonda 100 tsüngda tenlatsüpur periadok," ta Neal-i metetdaksü.

Angel studio-i tamalen "The Chosen" film reprangertemi taruba Easter nung 'His Only Son' film reprangba ajanga iba film takok angutsü imlar, ta metetdaksü.

"His Only Son" film nung tongti shilem agirji Lebanese film star aser TV actor Nicolas Mouawad lir; pai Abraham shilem agitsü.

Iba film reprangtsü atema His Only Son Movie.com nung jelia ticket mekazütsü akok.

## ANO GO ABEN TSÜNGREM DEN

## Temeim mapa kodang tessama masü

## 1 Yohan 3: 11-18

Nisung dang masü Kibuba dang tenzüker ama temulung ajunga agi tenzükerang. Efesa 6:7

Tsüngsem yanglur kati ashi, "Kü mapaji tanelatem kümzüktsüba, saka teintokbaji aatsü asoshi ni tsüngsem ateper." Pa mapaji asangtsü tetemsü, tamang katetba Khrista ka ama pai par kiyonger tsüngsemjia tajungtiba süa ateptsütsüla. Tanela anir aruba aser tsüngsem atepshiba nung tsüngsem yangluri kiyonger dang temeim sayu aser Tsüngremi yangluba apen süoshi aser tsüngsem agütsüba agi Tsüngrem yari. Yisu asoshi asen kiyonger dang meimtsü aser tenzüksü asoshi asenok aja. Asenok temeyoktep telok nung parnok nungdak tepenja lir. Asen ajak talidak ki, chiyongtsü, apen-süoshi, shishilembadak, leman, meti, tezüng, mozü aser aika nungdak lir. Mapa shiai meimchir junga alitsüba nung yarir. Asen mapa ajanga asenok asen kiyonger, shirnok Tsüngremi yanglu aser alangzük, parnok yarir.

Kodang asenoki asen kiyonger adianu ama reprangdir, iba jagi tangar dang nungi balaka küm daksür. Asenoki meimer kechiaser asenok Tsüngrem dangi anir arutsü asoshi Khristai asenok dang tama meim. Iba temeim sayutsü leman kaji asen mapa ajanga anogoshia asen kiyonger nungdak nung yaribaji lir. Iba temeim mapa kodang tesama masü.

O Yisu, Nai mapa jenjang angatet. Ibai temeim nung Na aser onok kiyonger atema inyakdakjang. Amen.

## Pope-i alima nung nisung shibe-lenba anentsü atema sarasadem

**March 08, 2023:** Pope dang nungjagi teimba Francis-i, taküm jenjang asütsü.

tajungba bushia Italy arrtsülen police-senzürtem lendong i ashiba agi, parnokji majurutsü atema Europe-i anir aotsü meimchir shibelenba ya atema ozüng alema nokdangtsüla, ta ashi. inyakerem nem nisung

March 5, 2023 nü St. shiai euro sen 8,000 Peter's Square nung agüja liasü. Rong nungji tesemdang 25,000 den nisung tali amenba den külemi sarasademba külemi 'life jackets' sülen Pope-i tawa Italy maliba aser aikati tzü kübok Cutro awa mashiba agi tzüyimkümlen rong lendong nungji nisung

lendong ka nung aika asü. asürtem aser takoksa Pope Francis-i, angurtem atema "M e i m c h i r sarasademja liasü. Iba s h i b e l e n e r t e m nokdangtsüla. Tai

lendong nung nisung 70 shi asü. maket nisungtem maneni samatsü atema

A f g h a n i s t a n , Pakistan, Syria, Iran, parnok nokdangtsüla," ta ashi. "Joko item ama linüktem nungi nisung 180 shi rong ka nung lendong ajanga meimchi Turkey nungi apusoba azü agi Mediterranean sülen Italy nunger nung tzü temerük tzüyimkümlen ka atongtsü temenendaksü," ta pai anasa rongji tzü telung ashi.

U.N. migration nung meküpok. agency-i ashiba agi, March 6 tashi nung nisung 80 dang iba taküm küm tenzüker lendong nungjagi tang tashi nung kümzükba jangjaogo, Mediterranean tzüyim anungji asürtemji 70 ji nung tejenokdak mali dang masü saka iba senzürtem 220 süogo.

## Arunachal nung shirangertem aneptsüba sentongtem nokdang

**March 08, 2023:** India kübok Arunachal Pradesh state nung sarasadema shirangertem aneptsüba sentong ayongzüka agiba nokdangogo.

Khristantemi ibaji ashishia, taneptsüba sentong nokdangba ya linük temzüng kübok yimsü temeden alema lir, ta metetdaksü.

February 28, 2023 nü Arunachal Pradesh kübok Upper Siang district nung ketdangsertemi sarasadema taneptsüba sentong agiba, taneptsüba crusades aser putirtemi sarasadema shirangertem aneptsüba nokdangogo.

District magistrate-i sangdong ka ajanga, "Item ama inyakyim ajanga tai maket nisungtem anisar. Ibai ajanga parnoki scientific medical treatment magir aser temang nung timtem tulu adokdaksür," ta metetdaksü.

"Shirangertem aneptsüba sentongtem agiba ajanga tamangba yimsü meyipa loktiliba-sobaliba tsütsü timtem adokdaksür aser nüburttem den telok balala tsüngda tesendaktep raksatsür," ta kasa

sangdong ajanga metetdaksü. Drug and Magic Remedies (Objectionable Advertisement) Act 1954 kübok arasenba mapa den taneptsüba sentongtem advertise asüba nokdangogo.

Sorkari, iba tenokdangba kübok nisung ajak, telok ajak aser yimsü ajak aiter, ta metetdaksü.

Sorkar tenokdangba aija Arunachal Christian Forum Tir, Tarh Miri Stephen-i, "Iba tetuyuba ya yimsü benshiba temeden anema lir," ta metetdaksü.

March 7 nü osangbener den jembidang Stephan-i, Arunachal Christian Forum-i district magistrate ajurua iba tenokdangba kulitem asüngdangtsü aser iba tetuyuba agienang ta mepishitsü, ta metetdaksü.

"District magistrate-i onoki mepishibaji magizükra onoki Chief Minister densema state sorkar tongti ketdangsertem dang mepishitsü," ta pai metetdaksü.

State sorkar ketdangsertemi iba tenokdangba magienra Khristantemi court nung ken o

benoktsüa akok.

Stephan-i, "Item ama sarasadem sentongtem ajanga shinga yimsü memeyipdaksür, kechiyong item sentong ya nisungtem temesepba mozü achiba aser yi ajemba indokdaksütsü atema lir," ta metetdaksü.

Arogo lenirtemibo tang sorkari tetuyuba ya Khristantem anema hadir ka lir ta bilemer, ibayongji Arogoi iba tetuyuba agütsüba kuli tejangja metetner.

Arunachal Pradesh yimtiba, Itanagar nung tongti putir, John Thomas Kattrukudiyil-i, "Iba ya kong tembangtsüar onoki repranga dang atadar," ta metetdaksü.

Arunachal Pradesh ya India tezülen China, Bhutan aser Myanmar linüktem den arrtsüa lir aser tang iba state nung Bharatiya Janata Party sorkar lir.

Arunachal Pradesh nung nütsüng million 1.5 lir aser nütsüng shilem 30 bo Khristantem lir; nütsüng shilem 29 Hindu nung lir aser tanüngba nütsüng shilem 26 ji lisopur telok balala nungi lir.

**AO OSHI ANGAZÜKDAK:  
TANÜ ANGAZÜKTSÜBA OJANG**



*Patio*

(n) Sali achiba süngo tu (betel leaf)

\* *Patio* ya sen kanga tasak kümogo.

*Patok*

(v) entok (thrown away)

\* Menden nung anak auyi jungjunga *patoker* amentsüla.

**OLONG PAITEP # 6450**

1		2				3		4		5
				6						
	7		8							
9					10			11	12	
			13		14	15				
16					17			18		
				19	20					
21		22								23
24										

**TIPILEN**

- 1. Saku - (4)
- 6. Songjen - (7)
- 7. Mali/Tazung - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüng kasa jatepba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütü teubaba - (3)
- 5. Anüngdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. --- tatsü - (3)
- 12. Tebur kidong aser zünga kasa tsüngda jatepba - (4)
- 14. Pela agizükba tapu ka - (5)
- 15. Tenüng atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6449 TELANGZÜBA**



**TIPILEN :**

- 2. Pongsen, 5. Lepko, 7. Omen,
- 8. Maangka, 10. Yangkhu,
- 12. Senpong, 14. Angu,
- 15. Raksa, 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

**Agüja aliba noksa nung meputepi  
aliba 9 bushiang**



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

**Manipur sorkari forest guards nem prangpong agütsür**



**Imphal, March 8, 2023**

(Agencies): Manipur sorkari forest guards tashi itdaksütsü aser temlung uludaksütsü atema prangpong alia agütsüogo.

Prangpong 100 aliba nungi forest personnel nem 49 agütsüogo aser parnok ya basic arms training agirtem lir, ta Manipur forest minister Th Biswajit-i ashi.

Tanünga prangpongji forest personnel tem training tembangba

sülen agütsütsü ta pai ashi.

2019 aser January 2023 tsüngda Manipur reserved forests nung hectares 14,699.04 tashi morok mi ajanga rongdoka liasü aser mi lendong 95 tashi nisung ajanga adokdaksüba liasü, ta forest minister Biswajit-i ashi.

Paisa forest personnel dang prangpong kumdanga amshitsü aser nübortem dang atem wazüka ayutsü angatetdaksütsü ayongzük.

Mongulbarnü Central Forest division, Parks and Sanctuary, Kangpokpi, Churachandpur, Thoubal, Bishnupur aser Chandel forest divisions nung forest guard nem prangpong agütsü.

Tawa tu Chief Minister N Biren Singh-i senden ka amenba sülen iba mapa ya inyaker.

Manipur sorkari reserved aser protected forest areas wazüka ayutsü ta Chief Minister Biren-i shia liasü.

**Assam nung Pakistan agents nem SIM cards agütsürtem apu**

**Guwahati, March 8, 2023**

(Agencies): Nagaon aser Morigaon district tem nung Pakistani agents nem mobile SIM cards agütsür nisung pungu puogo ta Bodbarnü Assam police-i metetdaksü.

Parnok ket nung mobile phone aika, SIM cards aser tanga taitü aketba kulitem ngutetogo. Parnok ket nungsa foreign embassy den defence information lemsatepba handset ka apu ta police-i ashi.

Intelligence Bureau aser tanga osangtem nung ajemdaker police-i Mongulbar aonung mita aodang nisung 5 apu, ta Assam Police

spokesperson Prasanta Bhuyan-i ashi.

"Iba district ana nung nisung 10 shi kati service providers balala nungi SIM cards alizüker aser Pakistani agents nem agütsür aser iba ajanga linük lendongi idaksür ta osang angazük" ta Bhuyan-i ashi.

Parnok nisung punguji Nagaon nungi Ashiqul Islam, Bodor Uddin, Mijanur Rahman aser Wahiduz Zaman aser Morigaon nungi Baharul Islam ta jangjaogo.

Parnok ket nungi mobile phones 18, SIM cards 136, fingerprint scanner ka, high-tech

CPU ka aser birth certificates, passbooks & photographs amala ngutet" ta Bhuyan-isa ashi.

Parnok dang asüngdangya asüdag Ashiqul Islam-i IMEI numbers ana aliba mobile handset ka amshi aser iba nungi WhatsApp call ajanga foreign embassy ka den defence information lemsatepba metet, ta paisa metetdaksü.

"Iba mobile phone ji pa ket nung bona lia nguogo. Tangartemjia iba mapa nung yaritepba luli ngutetogo aser IB ketdangsürtem den külemi parnok dang asüngdangya südar" ta Bhuyan-isa ashi.

**Mar 21 nungi Northeast-i Bharat Gaurav train yoktsü**



**Guwahati, March 8, 2023**

(Agencies): IRCTC tourism maparen nung shilem ka ama Indian Railways-i 'Bharat Gaurav Deluxe Tourist Train' tenzütsü.

March 21, 2023 nü New Delhi Safdarjung railway station nungi iba train apusotsü, ta railway ketdangsür kati ashi.

Iba train ajanga North-east circuit ajunga anir senzütsü aser Arunachal Pradesh, Assam, Tripura, Nagaland o Meghalaya asemstsü ta Ministry of Railways-i metetdaksü.

"Iba trip ya anogo 15 atema asütsü. North-east circuit atema omenji North East Discovery: Beyond Guwahati asütsü" ta

ketedangsürisa ashi.

March 21, 2023 nü Delhi Safdarjung railway station nungi train apusotsü aser Northeast India kübok tobur tajung tesentem sema senzütsü.

North East Discovery: Beyond Guwahati tour nung Assam nung Sivasagar, Guwahati, Jorhat Kaziranga, Agartala nung Unakoti, Nagaland nung Kohima aser Dimapur aser Meghalaya nung Shillong aser Cherrapunji semdangtsü.

Indian Railways-i 2021 nung Bharat Gaurav scheme tenzüka liasü aser iba ya Indian tourism ajungketsüba aser alima tesem balala nungi tourists atsür arutsü atema lir.

Centre sorkari domestic tourism ajungketsü atema Ek Bharat Shrestha Bharat aser Dekho Apna Desh sentong den külemi Bharat Gaurav scheme ya tenzüka.

Passenger temi Delhi, Aligarh, Ghaziabad, Tundla, Lucknow, Kanpur aser Varanasi nungi train nung amentsü mesüra alutsü akok.

Iba train ya deluxe AC trains asütsü aser tourists 156 amentsü akok. Train nung air-conditioned AC 1 aser AC 2 tiers lir.

Ticket telemsaji AC 2 Tier nung nisung ka nung Rs 1,06,990, AC 1 cabins nung Rs 1,31,990 aser AC 1 coupe nung Rs 1,49,290 asütsü.

## Israel-i Jenin nung nisung trok tepset, West Bank nung longkak ait



Israel sepaitemi Palestine nung trok tepseta ano nisung ter dak tema yirutsüba sülen occupied West Bank tesem ajungalen anogo ka longkak aitba noksa nung angur.

**Ramallah, Metsüremi/ March 08 (Agencies):** Israel sepaitemi Palestine nung trok tepseta ano nisung ter dak tema yirutsüba sülen occupied West Bank tesem ajungalen anogo ka longkak aita liasü.

Nisung tepsetba mechi Jenin, Nablus aser Ramallah densema yimitem nung Bodhbarnep shishilempaba tesemtem shibanga liasü.

School aser public institution temia kasa mera agiba shiogo, saka parnokbo mezüing yongi shibangtsü sentong liasü, kechiaser International Women's Day tenüing nung occupied West Bank nung official public holiday lir.

"Tanü Jenin aser danga tesemtem nung Israel nungeri nisung jenti takum lalutsüba aija longkak ya aiter, kong linük asoshi rarar nisung trok takum agi aser ter dak tema yirutsü," ta joint Palestinian factions' coordination committee nungi Issam Bakr-i Mongulbar aonung sangdong ka nung ashi.

Mongulbar nikongdang Israel army temi occupied West Bank north tsütsü Jenin refugee camp nung tashi tulu amshia amakdang injang agi tebur trok tepset aser ano 26 yirutsü, aser item rongnung nisung asem takum kumzüksü teimla

kangabo mali. Commercial store tem shibanga lir aser senzüsemponger kangabo mali. Nübur ajunga ain adokba ajiteter aser Palestinian yimti-yimtung sünga lir, ta Jenin nung osangbener kati ashi.

Longkak aita Mongulbar aonung Palestine nung meyririjang aika occupied West Bank nung temai adoka liasü.

Nablus nung Lions' Den telungpuri ayongzükba ama longkak ya aiter aser parnoki Palestine nung yimtung nung tejashi sayur, ta osangbeneri ashi.

Asürtem rongnung par pongu Jenin refugee camp nung alirtem aser itemji arishi küm 26 tain Mohammad Wael Ghazzawi, arishi küm 27 tain Tareq Natour, arishi küm 29 tain Ziad Zirini, arishi küm 22 tain Mutasem Sabbagh aser Mohammad Khloof alitsü.

Nisung trok buba arishi küm 49 tain Abdelfattah Kharousheh ya Nablus yimti nung aliba Askar refugee camp nungi lir, koba Jenin south tsütsü kilometre 40 pilar lir.

Israel army temi ashiba agi, Nablus anasa Huwara jila nung Kharousheh-i February 26 nü gari nung mener injang khalokja aoba mapang Israel

nung ana khaset ta temolung melemi lir.

Kharousheh ya Gaza nung amenoka aliba Hamas movement al-Qassam Brihades indang armed wing lenir ka liasü.

Pa den ano dangar kar Jenin refugee camp nung ki ka nun glia Israel sepaitemi Mongulbarnü iba camp ya mita ao aser kilung nung lia sapang aser rocket khalokja parnok tepset.

Occupied West Bank nung Palestine nung telungpur dak tenük yoker Israel-i amakba rongnung Mongulbarnü atalokba ya tesüsaba lir aser iba mapang parnoki civilian tema tepsetogo.

January ita tatemlen Israel nungeri Jenin nung tesem ka mita aodang tantsür ka densema Palestine nung nisung ter tepset. Iba sülen February 6 nü Jericho nung tesem ka mita aodang nisung pongu tepset aser February 11 nü Nablus nung tesem ka nung nisung 11 tepseta liasü.

Taküm Israel sepaitemi Palestine nungi 68 tepsetogo aser yangji aliba Israel nungeria Palestine nung rongu tepseta lir.

Palestine nungeria Israel nung 13 aser Ukraine nung ka tepseta lir.

## Imran Khan mechi Lahore nung lokti adenshiba nokdang

**Lahore, Metsüremi/March 08 (Agencies):** Pakistan antüdoklen Lahore yimti nung election rally ka nung taoba ato kilonser Imran Khan-i jembitsü ghonda ishika lia yangji anogo tenet nisung pezü dak tema adenshiba nokdangogo.

Pakistan nung nütsüing yongsük timtiba aliba province, Punjab nung sorkari Bodhbarnü ashiba agi, lendong timtem paidoktsü mechi lokti tabu balala adenshiba, mentepa kazüba, rallies, processions, demonstrations, longkak aitba aser iba amala maparen Lahore district ajunga nung nokdang.

Punjab provincial assembly election atema iba yimti nung

Khan'er Pakistan Tahreek-e-Insaf (PTI) party nübuyim tenzüksü ghonda ishika lia iba tenokdangba ya agütsü.

Lahore ya Punjab province indang yimtiba lir, kong election ya April 30 nü agitsü lir, aser provincial assembly anenba sülen election agitsü ya sangdong. Pakistan nung linük election tekeraba nung agidaktsütsü mechi Khan'er PTI ajanga assembly anentsü takhangba agüja liasü.

International Womens' Day nungtem nung "Aurat March" (Women's March) alitsü lia Lahore nung longkak aitba aser rally tem nokdang.

"Koba ozüing kübok Punjab

indang caretaker government-i police tashi tulu amshia teka tazüing aliba mapa inyaker rally nung medendaktsür. Sorkari arem indang ozüing amshir," ta Khan-i tweet ka nung ashi.

"Caretaker government mapa ajak agi election tajungtiba nung agidaktsütsü ya lir. Parnoki inyakba ya tashiyim agi ozüing, asen constitution aser democracy amshiba lir."

Lahore nung lokti adenshiba nokdanga aliba ozüing nung aibelener PTI busemer aika puogo aser water cannons khaloktsü, ta osang ajanga ashir.

Taoba küm April ita arishi küm 70 tain Imran Khan ya parliament nung no-confidence

## Pelaba Lemsateper



ASO :  
1940

ASÜ :  
13.02.2023

Onoki teti meima aliba ojala **Meyamenla Pongen**, shiranga aliba mapang nungi ozü asükhu tatempang anogo tashi, ana aser talang nung alir ajaki pei akokba tajungtiba agi ozü yaria aruba den ozü azüngmeyaka alidang onok mulung süngzüksüba asoshi nenok kija kibong ajak dang kangasa pelaba lemsateper.

Talisa item dang alakteta pelaba shisemer ;

- 1) Ao Baptist Church Diphupar
- 2) Dimapur Dibuia Senso Telongjem
- 3) Dibuia Fellowship 4th Mile
- 4) Dimapur Dibuia Fellowship
- 5) Dibuia Baptist Arogo
- 6) Dibuia Baptist Arogo Compound
- 7) Tongpang & Tsünangla Semchir.

Onoki nenok nem meyipa agütsütsü kecha maka saka asen tajung Tsüngremi nenok ajak molamoshia moajang ta ozü tamang sarasadem.

- Temeim Chirnur aser Anükapang.



### My Gratitude

My Dearest people of 16<sup>th</sup> Pütsero Assembly Constituency, I am indeed very much grateful to every individual for showering your support and help in every possible manner during the 14<sup>th</sup> General Election of Nagaland Legislative Assembly.

Though the result outcome was not in our favour, your loyalty towards me and the Party (NPF) is highly regarded and anticipated. In return, I pledged myself to help you within my capable responsibility.

With your prayer and support we were able to differentiate the true warriors of the party.

'Thank you' is my humble word and it carries my plea to God to bless our NPF Central Office for giving me the opportunity with the party ticket and every individual for your selfless support and sacrifices.

The step we took strengthens and motivates us to achieve our goal and be a true example to our State and Nation. Together we will stand for the truth that shall lead us to the fulfilment of our common dream.

My work will speak for itself

VIVOLIE KEZO  
NPF Candidate  
16<sup>th</sup> Pütsero AC

## ALI AYOKTSÜ LIR

Foothill road nungi minute 2  
Hozukhe village Rs 25/- per sq.ft.  
Phone no:- 8974869756 / 8259001052

# UCL: Chelsea-i Dortmund koka Quarterfinals-i iogo



Champions League nung Chelsea-i goal 2-0 agi Borussia Dortmund koker pelatepba noksa angur.

**Metsüremi/March 8, 2023**

**(Agencies):** Mongolbarn Champions League nung Chelsea-i goal 2-0 agi Borussia Dortmund koka 2-1 aggregate nung quarter-finals-i iogo.

Asaya nung Raheem Sterling aser Kai Havertz nati goal kaka idakja asaya akok aser manager Graham Potter anisüngzükdaktsüogo.

Chelsea puri taküm pound million 500 dak tema intoka asayartem alidenba sülena tajangzük kecha manguba sülen Potter ya jenjang tamajung ka nung liasü.

Chelsea puri Premier League nung taoba asaya 16 nungi asem dang koka parnok 10buba nung lir aser domestic cup nunga anaprongla nung

tsükatok. Ajisüaka sen tasak agi alizükba asayartemi iba asaya nung junga shilem agia parnok European Cup tasembenbuba akoktsü atema timla mesamai lir.

Dortmund pur tetoktepba ajak nung asaya 10 atonga koker England-i arua liasü. Ajisüaka asaya mezüngbuba shilem nung Marco Reus free-kick-i tajung ka metsüba dak alaka parnoki Chelsea pur nem kecha timtem magütsü dang asaya.

Kasa mapang nung Chelsea puri goal idaktsütsü asoshi maongka nguteta asaya aser Haverts-i goal ka idaktsü ajisüaka VAR teyari agiba sülen Sterling offside asüba ajanga iba goal magi aküm.

Ajisüaka half time atongtsü lia Sterling-i Chelsea pur atema mezüngbuba goal idaktsü. Chilwell-i agütsüba ball ya mezüngbo Sterling-i midaktsütet, ajisüaka pai süngjemshir asaya-a Reus bendok aser goal idakja liasü.

Asaya tanabuba shilem nung Chilwell-i ball cross asüba mapang Marius Wolf-i hand ball menaba VAR ajanga ngutetba sülen Chelsea nem penalty metsütsü maongka agütsü. Penalty ya Havertz-i metsü ajisüaka post nung ondaker adok ajisüaka VAR ajangsa Dortmund puri aibelenba ngutet aser penalty metsüshitsü atema maongka agütsü koba Havertz-i aibelen mestü idakja parnoki asaya akok.

# S Korea National Team coach asütsü Klinsmann shim

**Metsüremi/March 8, 2023**

**(Agencies):** South Korea national team head coach mapa abentsü atema Jurgen Klinsmann shimogo aser pa team nung denli Asian Cup akoktsü atema nukjidong yuogo, koba küm 60 dak tema ken danga mekokteti lir.

Arishi küm 58 tain Klinsmann, shibai asaya aliba mapang 1990 küm World Cup kokogo pai 2006 küm Germany team World Cup nung semifinal tonga ani aser U.S. tebur team 2014 World Cup nung tanabuba round tonga ania liasü. Pa ya Korea Football Association-i taoba ita shima liasü.

1960 küm nungi tang tashi nung South Korea-i continental championship ken danga koka mali aser parnok 2023 küm asayamung atema-a qualify süogo, koba taruba küm January ita asayatsü atema thinenogo.

"Kü nukjidongji Asian Cup akoktsüba atema lir," ta Klinsmann-i Bodhbarnü Incheon International Airport nung osangbenertem dang ashi. Pai 2026 küm World Cup tashi caoch mapa abentsü atema tenangzüktepba ka yangluogo.

"Iba maongka agütsüba mapang ni kanga nemadanga liasü aser kanga tushia bilema agizükogogo. Ni Korea aiben semdangogogo aser Korea ya linük tajung ka lir kong nübur aser team tajung lir," ta paisa

ashi. Asian Cup ya Qatar nung asayatsü, kong Korea-i taoba küm Decembr ita Portuguese coach Paulo Bento lenisüba nung World Cup tanabuba round tongteta asayaogo.

Klinsmann-i küm pongu sülen 2016 küm United States toktsü aser iba sülen pa Hertha Berlin indang coach mapa dang anogo 76 inyaka liasü, koba 2020 küm January ita tembangogogo. Taoba Bayern Munich, Inter Milan aser Tottenham Hotspur striker yagi ashiba agi, World Cup nung FIFA indang Technical Study Group nung züngsem ka ama pai South Korea team renloka aoba kanga junga asadangogogo.

"Korea-i 2022 World Cup nung kanga junga asayaogo aser ni team takok asoshi takokba tashi meranga inyaktsü," ta Klinsmann-i ashi. "Taoba coach Guus Hiddink nungi tenzüker Bento tashi nung parnoki team tajung ka yangera toktsüogogo aser iba team yagi World Cup nung Portugal aser Germany amala tashi tait team dena kokogo," ta pai shisem.

Korea team coach ama Klinsmann asoshi mezüngbuba asayaji Colombia den March 24 nü friendly ka asayatsü aliba ya asütsü aser iba sülen anogo peü lir Uruguay den asayatsü. 2026 World Cup atema Asian qualifying October ita tenzükttsü.

# Super Cup April 3 nü nungi tenzüka Kerala nung asayatsü

GROUP A	GROUP B
BENGALURU FC	HYDERABAD FC
KERALA BLASTERS FC	ODISHA FC
ROUNDGLASS PUNJAB FC	EAST BENGAL FC
WINNER Q-1	WINNER Q-3
GROUP C	GROUP D
ATK MOHUN BAGAN	MUMBAI CITY FC
FC GOA	CHENNAIYN FC
JAMSHEDPUR FC	NORTHEAST UNITED FC
WINNER Q-2	WINNER Q-4

**Metsüremi/March 8, 2023**

**(Agencies):** India nung football asaya kanga kara renloka odar aser 2022-23 season nung ano tali renlokyonga aoba nguogo. Tang season tatemi fan temi Super Cup asayaba angutsü aser iba asayamung atema Mongolbarnü fixture yangluogo.

Taküm mezüngbuba Super Cup ya Kerala nung asayatsü. Asayamung nung team 16 temaba jenjang atema tokteptsü aser Super Cup akokba team continental level nung asayatsü atema maongka angutsü.

Super Cup akokba team ya taoba season I-League champions Gokulam Kerala FC den asayatsü aser iba asaya akokba team AFC Cup South

Zone group nung asayatsü atema maongka angutsü.

Iba asayamung nung Indian Super League nungi team 11 aser I-League nungi team teri shilem agiba angutsü. Hero ISL nungi team terka aser I-League akokba team iba asayamung group stage atema indang indanga qualify asütsü.

I-League nungi team tenet (tanabuba nungi tibuba tashi) asayamung group stage nung asayatsü atema playoff qualifiers ka asayatsü. Maneni tekububa aser terbuba nung tembangba team ana qualifiers nung shilem agitsü atema qualifying playoff ka asayatsü.

Super Cup ya team 16 telok pezü küma lemsar asayatsü.

Group A nung Bengaluru FC, Kerala Blasters FC, tawa I-League akokba team RoundGlass Punjab FC aser second ranked I-League team aser eliminator akokba team na takoker densema alitsü.

Group B nung Hyderabad FC, Odisha FC, East Bengal FC aser pezübuba aser tenetbuba nung aliba I-League team playoff akokba team densema lir. ATK Mohun Bagan, Jamshedpur FC, FC Goa aser I-League nung tasembuba aser tibuba nung aliba team playoff akokba team Group C nung densema lir.

Group D nung ISL 2022-23 League Shield koker aliba team Mumbai City FC, Chennaiyin FC, North East United FC aser I-League nung jenjang pongububa aser trokbuba na tsüngda asaya akokba team densema lir.

"Iba asayamung yagi Indian football nung mabensa aliba shilem ka abensadaktsütsü. Hero Super Cup ajanga onoki tawa aliba süngdaktsütsü meranger aser iba asayamung akokba team taruba season AFC Cup nung tokteptsü atema maongka angutsü," ta AIFF secretary general Shaji Prabhakaran-i ashi..

"Super Cup ya Hero ISL aser Hero I-League na tsüngda tesendaktep tongtibang ka lir. Iba asayamung nung linük nung temaba League nungi team tajungtibatem adenshia kati ka den tokteptsü," ta paisa ashi.

# Jasprit Bumrah New Zealand nung surgery agiogo

**New Delhi, Metsüremi/March 8 (Agencies):**

Ita trokshi masayai arur India nunger pacer Jasprit Bumrah Hombarnü New Zealand nung teberem surgery agiogo aser pa ita tatem tashi iba linük nung dang alitsü, ta ESPNcricinfo-i metetdaktsü.

Bumrah, IPL 2023 aser ICC World Test Championship final (India qualify süra) nung masayatetsü aser ICC World Cup nung asayatsü atema August ita nungiang training agi tenzükttsü. WC ya India nung taküm October aser November ita asayatsü lir.

Bumrah taoba küm September ita nungi tang tashi tetoktepba balala nung shilem magi-i aruda. Pa kidang South Africa den asayaba mapang teberem nung timtem aliba ajanga masayatetsa aküm. Pa January ita Sri Lanka den white-ball home series asayaba mapang meyipa arutsü merandang ajisüaka kasa timtem agi masayatetsüsa aküm.

National Cricket Academy (NCA), Bengaluru nung BCCI medical staff temi pa temang anepalua aruogo aser pa surgery agitsü atema shia liasü. Asayar aser NCA den tongtepratepba sülen surgery agitsü atema BCCI-i telemtetba agia liasü.

August ita yirua Asia Cup nunga masayatetba sülen

Bumrah-i maneni asayatsü atema merandangogogo. Mezüngbo pa yiruba ya kanga süoki iabo magi aser pa September ita India indang T20 World Cup squad nunga züngoksem aser September 23 aser 25 nü Australia den tatembangbuba T20I asaya ana dena asaya liasü.

Anogo asem sülen pa South Africa den mezüngbuba T20I asaya nung shilem magitet aser iba sülen pa scan agia teberem yirur aliba nguteta liasü. Iba sülen pa NCA-i anir ao aser ken o jangjashitsü atema scane tanaben agishia liasü aser T20 World Cup nung masayatetsa aküm.

Bumrah November ita nungi rehab tenzüker aser December tom nungibo ball onshi tenzüker. Pa temang tajungba akümer ama bilema January ita asayaba team nung züngoksema liasü.

Bumrah-i NCA nung match simulation exercise tem agi, saka January ita fitness drills agiba mapa temang nung minprong maneni adok. Scan agiba sülen pa teberem nung maneni timtem aliba ngutet aser Sri Lanka aser Australia den asayatsü aliba asayamung team nung mezüngoksem.

Indian team management aser captain Rohit Sharma-i, Bumrah kanga junga tanepetsü anguba sülenang team nung asayadakttsüner.

## BILEMDANGANG

"Pei shisatsü peisasa dang azüoktettsü."